

LIGJ Nr. 9366, datë 31.3.2005

PËR GRADAT DHE KARRIERËN NË GARDËN E REPUBLIKËS SË SHQIPËRISË

Në mbështetje të neneve 78 dhe 83 pika 1 të Kushtetutës, me propozimin e Këshillit të Ministrave,

KUVENDI I REPUBLIKËS SË SHQIPËRISË

VENDOSI:

KREU I DISPOZITA TË PËRGJITHSHME

Neni 1 Objekti dhe qëllimi

Ky ligj përcakton rendin e gradave, përparimin në gradë dhe në karrierë, përgjegjësitë, që rrjedhin nga karakteri i veçantë i detyrës dhe i shërbimit në Gardën e Republikës së Shqipërisë dhe ndërprerjen e karrierës së oficerit dhe nënoficerit të Gardës, në përputhje me ligjin nr.8869, datë 22.5.2003 "Për Gardën e Republikës së Shqipërisë".

Neni 2 Përkufizime

Në këtë ligj, termat e mëposhtëm kanë këtë kuptim:

1. "Gradat" janë tituj dhe shenja dalluese në emërtesën e hierarkisë në Gardën e Republikës së Shqipërisë.
2. "Hierarkia në Gardë" është rendi i gradave dhe i funksioneve në Gardën e Republikës së Shqipërisë. Për gradë dhe funksion organik të njëjtë qëndrojnë më lart në hierarki oficeri dhe nënoficeri i Gardës me vjetërsi më të madhe shërbimi.
3. "Rendi i gradave dhe i funksioneve" është shkallëzimi i gradave nga më e ulëta te më e larta, sipas lidhjeve dhe varësisë që kanë ndërmjet tyre.
4. "Karriera" është rendi i gradave të oficerit dhe nënoficerit të Gardës gjatë kohës që shërbejnë në strukturat e saj, sipas kualifikimit, aftësive drejtuese e profesionale dhe vjetërsisë në shërbim.

Neni 3

Oficeri dhe nënoficeri i Gardës, në varësi të gradës, klasifikohen në epror dhe vartës.

KREU II GRADAT NË GARDËN E REPUBLIKËS SË SHQIPËRISË

Neni 4

Në Gardën e Republikës së Shqipërisë gradat u jepen oficerëve dhe nënoficerëve të shërbimit aktiv.

Neni 5

Gradat për oficerët dhe nënoficerët klasifikohen në grada të ulëta, të mesme, të larta dhe madhore.

Neni 6

Gradat në Gardën e Republikës së Shqipërisë dhe barazvlefshmëria e tyre me gradat në Policinë e Shtetit janë si më poshtë:

A. Për nënoficerët:

Grada në Gardë Grada korresponduese në Policinë e Shtetit

a) Grada të ulëta: Rreshter Kapter IV Agjent; Agjent.

b) Grada të mesme:

Kapter III Agjent i parë; Kapter II Agjent i parë; Kapter I Asistent.

c) Grada të larta:

Kapter mjeshtër Asistent; Kapter shtabi Asistent i parë; Kapter Asistent i parë.

ç) Grada madhore:

Kryekapter Kryeasistent.

B. Për oficerët:

a) Grada të ulëta:

Nëntoger Nën inspektor; Toger Nën inspektor.

b) Grada të mesme:

Nën kapiten Inspektor; Kapiten Kryeinspektor.

c) Grada të larta:

Major Nënkomisar; Nënkolonel Komisar; Kolonel Kryekomisar.

ç) Grada madhore:

Gjeneral i Gardës Drejtues.

Neni 7

1. Koha e qëndrimit në gradë për oficerin dhe nënoficerin e Gardës është si më poshtë:

A. Për nënoficerët: a) Grada të ulëta:

Rreshter 2 (dy) vjet;
Kapter IV 3 (tre) vjet.

b) Grada të mesme:

Kapter III 3 (tre) vjet;
Kapter II 3 (tre) vjet;
Kapter I 3 (tre) vjet.

c) Grada të larta:

Kapter mjeshtër 4 (katër) vjet ose deri në daljen në pension për specialitete të veçanta;
Kapter shtabi 5 (pesë) vjet;
Kapter 5 (pesë) vjet.

ç) Grada madhore:

Kryekapter 7 (shtatë) vjet.

B. Për oficerët: a) Grada të ulëta:

Nëntoger 2 (dy) vjet;
Toger 3 (tre) vjet.

b) Grada të mesme:

Nënkapiten 4 (katër) vjet;
Kapiten 5 (pesë) vjet.

c) Grada të larta:

Major 5 (pesë) vjet;
Nënkolonel 5 (pesë) vjet;

Kolonel 5 (pesë) vjet.

2. Dhënia e gradës nga kolonel deri gjeneral i Gardës bëhet në bazë të aftësive drejtuese, profesionale, të arsimit dhe kualifikimit.

3. Oficerët, që kanë fituar gradat e larta major deri nënkolonel dhe që shërbejnë në specialitete si inxhinier, mjek, ekonomist, jurist, financier, psikolog në xheno, në armatim dhe në specialitete të tjera të ngjashme, të përcaktuara nga Ministri i Rendit Publik, në rast se nuk parashikohet gradë më e lartë, sipas funksionit organik që kryejnë, qëndrojnë në këtë gradë deri në kohën e daljes në pension të parakohshëm.

4. Nënoficerët, që kanë fituar gradën kapter mjeshtër dhe që punojnë në funksione të veçanta, të përcaktuara me urdhër të Ministrit të Rendit Publik, nuk mund të marrin gradë më të lartë për sa kohë qëndrojnë në atë detyrë.

Neni 8

Koha e qëndrimit në një grade

1. Koha maksimale e qëndrimit në një Koha në shërbim gradë është si më poshtë:

A. Titullimi i gradës për nënoficerët

Rreshter 6 (gjashtë) vjet;

Kapter IV 8 (tetë) vjet;

Kapter III 15 (pesëmbëdhjetë) vjet;

Kapter II 18 (tetëmbëdhjetë) vjet;

Kapter I 20 (njëzet) vjet;

Kapter mjeshtër 27 (njëzet e shtatë) vjet;

Kapter shtabi 29 (njëzet e nëntë) vjet;

Kapter 32 (tridhjetë e dy) vjet;

Kryekapter 35 (tridhjetë e pesë) vjet.

B. Titullimi i gradës për oficerët Koha në shërbim

Nëntoger 6 (gjashtë) vjet;

Toger 8 (tetë) vjet;

Nënkapiten 15 (pesëmbëdhjetë) vjet;

Kapiten 18 (tetëmbëdhjetë) vjet;

Major 23 (njëzet e tre) vjet;

Nënkolonel 27 (njëzet e shtatë) vjet;

Kolonel 30 (tridhjetë) vjet;

Gjeneral i Gardës 35 (tridhjetë e pesë) vjet.

2. Oficerit të Gardës, që ka 15 vjet shërbim dhe ka plotësuar afatin maksimal të qëndrimit në gradën kapiten, i lind e drejta e karrierës, në varësi të nevojave e të kualifikimit përkatës.

3. Oficeri dhe nënoficeri i Gardës, të cilët kanë plotësuar afatin maksimal të qëndrimit në një gradë dhe nuk kanë marrë gradën e radhës, dalin në rezervë.

4. Nga pika 1 e këtij neni përjashtohen oficerët e Gardës të përcaktuar në pikën 3 të nenit 7 të këtij ligji.

Neni 9

Vjetërsia në çdo gradë e oficerit dhe nënoficerit të Gardës, për efekt të marrjes së gradës së radhës, llogaritet si më poshtë:

a) kur plotëson kriteret, nga dita kur i lind e drejta për marrjen e kësaj grade;

b) kur nuk plotëson kriteret, nga dita e daljes së urdhrit për marrjen e gradës.

Neni 10

Ndërprerja e karrierës për shkak pezullimi për më shumë se 3 muaj nuk llogaritet si vjetërsi për efekt gradimi, përveç rastit kur pezullimi ose qëndrimi në dispozicion është bërë me urdhër ose vendim të paligjshëm apo të padrejtë, të përcaktuar si të tillë me vendim gjykate të formës së prerë. Në këtë rast koha e ndërprerjes së karrierës llogaritet si vjetërsi, për efekt gradimi.

KREU III KARRIERA, KRITERET DHE MËNYRA E GRADIMIT NË GARDËN E REPUBLIKËS SË SHQIPËRISË

Neni 11

Karriera dhe ecuria në gradë e oficerit dhe nënoficerit të Gardës janë në varësi të arsimimit dhe të kualifikimit për gradën dhe funksionin që kryejnë.

Neni 12

1. Për kualifikimin e oficerit dhe nënoficerit të Gardës krijohet Instituti i Gardës së Republikës. 2. Kurset e kualifikimit për oficerët, afatet dhe procedurat e zhvillimit të këtyre kurseve për çdo gradë, si dhe barazvlefshmëria e tyre me kurset e kualifikimit jashtë vendit përcaktohen me urdhër të Ministrit të Rendit Publik. 3. Kurset e kualifikimit për nënoficerët dhe procedurat e zhvillimit të këtyre kurseve për çdo gradë përcaktohen me urdhër të Komandantit të Gardës.

Neni 13

1. Gradat për nivelin nënoficer jepen nga Komandanti i Gardës, me propozimin e komisionit përkatës. 2. Kursanti, që përfundon kursin në Institutin e Gardës, titullohet nënoficer dhe i jepet grada rreshter. Të drejtën e propozimit për titullimin nënoficer, pas përfundimit të kursit, e ka Drejtori i Institutit të Gardës së Republikës së Shqipërisë.

Neni 14

1. Titullimi oficer aktiv dhe dhënia e gradës së parë të oficerit të Gardës bëhen me urdhër të Ministrit të Rendit Publik. 2. Studenti, që diplomohet në shkollat e larta ushtarake dhe të policisë, brenda dhe jashtë vendit, në universitetet civile, për specialitete të veçanta, pasi të ketë kryer kursin përkatës profesional, merr gradën nëntoger dhe titullohet oficer aktiv në Gardën e Republikës së Shqipërisë. Studentit, që ka përfunduar kursin me rezultate të shkëlqyera, mund t' i jepet grada toger.

Neni 15

1. Oficerit dhe nënoficerit të Gardës u lind e drejta për gradimin e radhës kur: a) kanë plotësuar afatin kohor të qëndrimit në një gradë, sipas nenit 7 të këtij ligji; b) kanë kryer arsimin dhe kualifikimin e nevojshëm në shkollat përkatëse dhe në kurset e organizuara nga Instituti i Gardës, nga Policia e Shtetit apo kanë kryer kurse në universitete të tjera civile, brenda dhe jashtë vendit; c) kanë rezultate dhe vlerësim vjetor pozitiv të punës. 2. Komisionet e gradave e të karrierës shqyrtojnë dhe vlerësojnë dhënien e çdo grade më të lartë për oficerin dhe nënoficerin e Gardës, si më poshtë: a) për nënoficerin vetëm 1 herë; b) për oficerin me gradën toger deri kolonel 2 herë; c) për oficerin me gradën gjeneral i Gardës vetëm 1 herë.

Neni 16

Oficeri dhe nënoficeri i Gardës, për të fituar gradën e radhës, duhet të plotësojnë kriteret e mëposhtme: a) nëntogeri fiton gradën toger pas plotësimit të afatit kohor të qëndrimit në gradën nëntoger; b) togeri fiton gradën nënkapiten pas plotësimit të afatit kohor të qëndrimit në gradën toger, si dhe pasi të ketë kryer kursin përkatës në Institutin e Gardës ose kurse të tjera të barazvlefshme në akademitë e policisë apo në ato ushtarake, brenda ose jashtë vendit; c) nënkapiteni fiton gradën kapiten pas plotësimit të afatit kohor të qëndrimit në gradën nënkapiten, si dhe pasi të ketë kryer kursin përkatës në Institutin e Gardës ose kurse të tjera të barazvlefshme në akademitë e policisë apo në ato ushtarake, brenda ose jashtë vendit; ç) kapiteni fiton gradën major pas plotësimit të afatit kohor të qëndrimit në gradën kapiten, si dhe pasi të ketë kryer kursin përkatës në Institutin e Gardës ose kurse të tjera të barazvlefshme në akademitë e policisë apo në ato ushtarake, si dhe në shkollat të tjera të larta civile, për specialitete të veçanta, brenda ose jashtë vendit; d) majori fiton gradën nënkolonel pas plotësimit të afatit kohor të qëndrimit në gradën major, si dhe pasi të ketë kryer kursin përkatës në Akademinë e Policisë "Arben Zylyftari" apo në Akademinë Ushtarake "Spiro Moisiu" ose kurse të tjera të barazvlefshme me to, brenda apo jashtë vendit; dh) nënkoloneli fiton gradën kolonel pas plotësimit të afatit kohor sipas këtij ligji, si dhe pasi të ketë kryer kursin përkatës në Akademinë e Policisë "Arben Zylyftari" apo në Akademinë Ushtarake "Spiro Moisiu"; e) koloneli fiton gradën madhore pasi të ketë kryer kurs kualifikimi në Akademinë e Policisë "Arben Zylyftari", kursin e Kolegjit të Lartë të Mbrojtjes ose kurse në kolegje të larta jashtë vendit, të barazvlefshme me to, gjithashtu, duhet të ketë mbrojtur gjuhën angleze.

Neni 17

1. Oficerët, që kryejnë detyra në specialitetet e inxhinierit, të mjekut, ekonomistit, financierit, juristit, psikologut në xhenio, në armatim e në specialitete të tjera të ngjashme me to, të përcaktuara nga Ministri i Rendit Publik, e fitojnë gradën major në bazë të vjetërsisë në profesion dhe jo sipas kriterëve të përcaktuara në nenin 16 të këtij ligji. 2. Oficerët e përmendur në pikën 1 të këtij neni, për të fituar grada më të larta, kur i parashikon funksioni organik, duhet të kryejnë kurset e kualifikimit, të parashikuara për çdo gradë, sipas nenit 16 të këtij ligji. 3. Kur oficerët e Gardës, të specialiteteve të përmendura në pikën 1 të këtij neni, plotësojnë kriteret dhe kërkojnë të përparojnë në gradë e karrierë, sipas përcaktimeve të pikës 2 të këtij neni, organet kompetente janë të detyruara t'u ofrojnë kurset e nevojshme të arsimimit dhe kualifikimit.

Neni 18

Gradimi i parakohshëm i oficerit dhe nënoficerit të Gardës në gradën e radhës mund të bëhet vetëm një herë gjatë karrierës së tyre, me propozimin e Komandantit të Gardës, në bazë të rezultateve të larta, të arritura gjatë kryerjes së misioneve me rrezikshmëri të lartë.

KREU IV ORGANIZIMI I KONKURSEVE

Neni 19

Për oficerët konkurrimet për fitimin e gradave zhvillohen çdo vit, me urdhër të Ministrit të Rendit Publik dhe për nënoficerët zhvillohen çdo vit, me urdhër të Komandantit të Gardës. Në këta urdhra përcaktohen edhe numri i vendeve të disponueshme për çdo gradë, afatet e paraqitjes dhe të pranimit të kërkesave, si dhe procedurat e zhvillimit të konkurimit. Shpallja e fituesve bëhet nga komisioni përkatës i gradave dhe i karrierës.

Neni 20

1. Autoritetet kompetente për vlerësimin e përparimit të oficerëve e të nënoficerëve në gradë e karrierë, si dhe për kualifikimin e tyre janë komisionet e gradave dhe të karrierës. Përcaktimi i komisioneve është si më poshtë: A. Komisioni i gradave dhe i karrierës, për gradat e nivelit të lartë, të mesëm dhe të ulët, propozohet nga Komandanti i Gardës dhe miratohet nga Ministri i Rendit Publik. Në këtë komision marrin pjesë: a) gjenerali i Gardës; b) dy kolonelë; c) një nënkolonel; ç) përfaqësuesi i Drejtorisë së Burimeve Njerëzore në Ministrinë e Rendit Publik. B. Komisioni i gradave dhe i karrierës për nënoficerët, i cili miratohet nga Komandanti i Gardës, ka në përbërje: a) një kolonel; b) dy nënkolonelë; c) një major; ç) një kryekapter. 2. Komisionet e gradave e të karrierës i përfundojnë procedurat e punës deri në muajin qershor të çdo viti. Funksionimi i këtyre komisioneve përcaktohet me urdhër të Ministrit të Rendit Publik.

Neni 21

1. Gradimet për oficerët e nivelit të ulët, të mesëm dhe të lartë në Gardën e Republikës bëhen me urdhër të Ministrit të Rendit Publik, në bazë të propozimit të Komandantit të Gardës, sipas rezultateve të shpallura nga komisionet e gradave dhe të karrierës së Gardës. 2. Grada madhore jepet me dekret të Presidentit të Republikës, me propozimin e Ministrit të Rendit Publik dhe pas miratimit të Kryeministrit.

Neni 22

1. Për mosmarrëveshjet, që lindin gjatë procedurave të dhënies së gradës, oficeri dhe nënoficeri i Gardës kanë të drejtë të ankohen te Ministri i Rendit Publik brenda 10 ditëve. Ministri i Rendit Publik duhet të japë përgjigje brenda 30 ditëve. 2. Kur mosmarrëveshjet nuk zgjidhen sipas pikës 1 të këtij neni, oficerit dhe nënoficerit të Gardës u lind e drejta të ankohen në Gjykatën e Shkallës së Parë, Tiranë, brenda 30 ditëve nga data e njoftimit.

Neni 23

Oficeri dhe nënoficeri i Gardës, që dalin në lirim për efekt moshe, paaftësie shëndetësore, si dhe ata që dalin në rezervë, gëzojnë të drejtën e mbajtjes së uniformës dhe të gradës, që kishin në çastin e ndërprerjes së karrierës. Gjithashtu, ata lejohen ta mbajnë uniformën në raste festash zyrtare dhe gjatë ceremonive që organizon Garda e Republikës.

Neni 24

Oficeri dhe nënoficeri i Gardës në rezervë rikthehen në shërbimin aktiv, kur bëhen shtesa në personelin e Gardës. Në këtë rast ata mbajnë gradën, që kishin në çastin e daljes në rezervë.

Neni 25

Forma dhe elementet e gradave, të shenjave dalluese dhe të uniformës së oficerit dhe nënoficerit të Gardës së Republikës së Shqipërisë miratohen me vendim të Këshillit të Ministrave.

KREU V DISPOZITA KALIMTARE DHE TË FUNDIT

Neni 26

1. Njësimi i gradave me funksionet organike dhe i pagës për gradë në Gardën e Republikës së Shqipërisë përcaktohen me vendim të Këshillit të Ministrave. 2. Deri në momentin e miratimit të pagës për gradë, oficeri dhe nënoficeri i Gardës marrin shpërblimin mujor, sipas kriterëve të përcaktuara për Forcat e Armatosura të Republikës së Shqipërisë.

Neni 27

1. Kur oficeri dhe nënoficeri i Gardës, me hyrjen në fuqi të këtij ligji, mbajnë një gradë më të ulët se ajo që u takon në bazë të vjetërsisë në shërbim, të arsimimit dhe kualifikimit, ata marrin gradën përkatëse, sipas kriterëve të këtij ligji. 2. Përputhja e gradës me funksionin organik, sipas këtij ligji, bëhet për një periudhë deri në dy vjet nga çasti i hyrjes në fuqi të ligjit dhe jo më pak se koha e nevojshme për kryerjen e kursit të kualifikimit, për marrjen e gradës sipas funksionit. 3. Funksioni në asnjë rast nuk mund të jetë më i lartë se një shkallë për gradën korresponduese deri në çastin e përputhjes, sipas përcaktimit dhe afateve të caktuara në këtë ligj.

Neni 28

1. Ngarkohet Këshilli i Ministrave që, brenda 6 muajve nga data e hyrjes në fuqi të ligjit, të nxjerrë aktet nënligjore në zbatim të neneve 25 dhe 26 të këtij ligji. 2. Ngarkohet Ministri i Rendit Publik që, brenda dy muajve nga data e hyrjes në fuqi të ligjit, të nxjerrë aktet nënligjore në zbatim të neneve 7 pikat 3 e 4, 12 pika 2, 14 pika 1, 17 pika 1, 19 dhe 20 pika 2 të këtij ligji.

Neni 29

Ky ligj hyn në fuqi 15 ditë pas botimit në Fletoren Zyrtare.

Shpallur me dekretin nr.4540, datë 13.4.2005 të Presidentit të Republikës së Shqipërisë Alfred Moisiu